

Headlines

- सत्त मई गी त्रीए मरहले दे लोकसभा चुनाएं लेई मुल्ले च चुनां प्रचार जोरें पर ऐ। इस गेड़ तैहत राजौरी-अनंतनाग पार्लियामनी नाशिस्तै पर बी चुनांस करोआए जाने ना।
- मुख् सचिव ते मुख् चुनांस अधिकारी नै मौसम, सड़कें दी स्थिति ते मतदाता केंद्रें तोड़ी पुज्ज बारै व्यापक रिपोर्ट चुनांस आयोग गी देई दिती ऐ। चुनांस आयोग तौलें गै अनंतनाग लोकसभा सीटै दे चुनाएं बारै कोई मुकदा फैसला लैगा।
- जम्मू-कश्मीर च आतंकवादिएं कन्नै होई दी गोलीबारी च इक ग्रामीण रक्षा गार्ड शहीद होई गेआ, तपाश मुहिम तेजिया कन्नै चला'रदी ऐ।
- प्रधानमंत्री नरेंद्र मोदी होरें दस्सेआ ऐ जे पिछले 10एं बरें च उंदी सरकार नै लौहके करसानें गी करसान उत्पादक संगठनं राहें कृषि उत्पादन दे खर्चे च कटौती ते उनेंगी मुक्त मंडी हासल करोआने च मदाद कीती ऐ।
- प्रशासनिक सचिवें गी निर्देश दिते गे'न जे ओहू श्रीनगर ते जम्मू सिविल सचिवालये च अपनी उपलब्धता यकीनी करन।

3<sup>rd</sup> Phase Campaign

लोकसभा दे त्रीए चरण दे चुनाएं लेई सब्बनं पार्टियें दे बड्डे लीडर बक्ख-बक्ख पार्लिमानी हल्कें च चुनांस रैलियां ते रोड शो आयोजित करियै मतदाताएं गी अपने पाससै करने दी पूरी कोशिश करा रदे ना। 7 मई गी त्रीए मरहले दे लोकसभा चुनाएं तैहत मुल्ले दे 10एं राज्यें ते द'ऊं केंद्र शासित प्रदेशें दे 95 पार्लिमानी हल्कें च चुनां करोआए जाने ना। जम्मू-कश्मीर दी राजौरी-अनंतनाग पार्लिमानी नाशिस्ते पर बी 7 मई गी चुनां करोआए जाने ना। इस गेड़ तैहत 1 ज्हार 351एं मेदवारें दे सियासी भविक्ख दा फैसला होना ऐ। जम्मू-कश्मीर दे साबका मुख्मंत्री ते नेशनल कांफ्रेंस दे लीडर अपनी पार्टी दे मेदवार मियां अल्लाफ हुंदे हक्के च सरगर्मी कन्नै चुनां प्रचार करा रदे ना। पीडीपी अध्यक्ष ते साबका मुख्मंत्री महबूबा मुफ्ती बी अपने हक्के च पुंछ च रोड शो करियै लोकें गी अपने पाससै करने दी कोशिश करा रदियां ना। उनें पुंछ च रोड शो दौरान लोकें गी उन्दे हक्के च वोट पाने दी अपील कीती। उनें आखेआ चुनां पीडीपी ते नेशनल कांफ्रेंस बश्कार टकराव नेई ऐ, सगुआं एहू संसद च लोकें दी अवाज पजाने दी इक कोशिश ऐ।



## Rajouri-Anantnaag

जम्मू कश्मीर दे मुख् सचिव अटल डुल्लू ते मुख् चुनां अधिकारी पी.के.पोले होरें अनंतनाग-पुंछ-राजौरी संसदी हल्के च मौसम ते शिडक दी स्थिति बारे सरबंधत अधिकारिणं थमां जानकारी हासल करने परैंत भारती चुनां आयोग गी तफसीली रिपोर्ट भेजी दित्ती ऐ। इस हल्के च त्रिए गेड तैहत 7 मई गी वोट पोआए जाने ना। एह्दे शा पैहले अनंतनाग सीट दे रिटर्निंग अफसर सैयद फखरुद्दीन होरें इक बैठक सद्दी जेह्दे च सब्बनें सियासी पार्टिणं दे मेदवारें जां उंदे नुमायंदे हिस्सा लैता। रिटर्निंग अफसर होरें संसदी हल्के च मौसम ते शिडक दी स्थिति बारे उंदी राय हासल कीती। मुख् सचिव ते मुख् चुनां अधिकारी होरें सब्बनें सरबंधत धड़ें थमां मौसम ते शिडकें दी स्थिति, जेह्दे च अनंतनाग गी पुंछ-राजौरी कन्नै जोड़ने आली मुगल रोड बी शामिल ऐ, दे बारे च व्यापक रिपोर्ट हासल कीती। मेद ऐ जे चुनां आयोग इस संसदी सीट लेई मतदान बारे इक-दऊं दिनें च कोई मुक्कदा फैसला लैगा। उआं फिलहाल इस सीट लेई 7 मई गी मतदान होना ऐ।

<><><><><><>

## BJP-Like Minded

बीजेपी दे प्रदेश प्रधान रविंद्र रैना होरें अज्ज आखेआ ऐ जे उंदी पार्टी कश्मीर च इक्कै जनेई विचारधारा आली पार्टिणं गी समर्थन देगा। उआं उनें लोकें गी कांग्रेस थमां दूर रौहने लेई बी आखेआ ऐ। रैना होरें दावा बन्नेआ जे बीजेपी जम्मू ते उधमपुर सीटें पर बड्डी जित्त हासल करोग। अनंतनाग राजौरी सीट पर चुनां अगड़ा पाए जाने दी मंग बारै पुच्छे जाने पर उनें आखेआ जे इस बारै फैसला चुनां आयोग आस्सेआ कीता जाना ऐ।

<><><><><><>

## J&K Gunfight

उधमपुर जिले च आतंकवादिणं कन्नै होए दे टाकरे च इक विलेज डिफेंस गार्ड दी मौत होई गई ऐ। आकाशवाणी दे जम्मू संवाददाता मुजब अज्ज बडुलै उधमपुर जिले दे बसंतगढ़ इलाके च आतंकवादिणं ते पुलस ते विलेज डिफेंस गार्ड दे सदस्यें दी इक सांझी टीम बश्कार टाकरा होई गेआ। टाकरे च ज़ख्मीं होए दे विलेज डिफेंस गार्ड मोहम्मद शरीफ नै मगरा दम त्रोड़ी दित्ता। इस घटना दे बाद उधमपुर थमां फौज ते होरनें सुरक्षाबलें गी उत्थे भेजी दित्ता गेआ। एसओजी, फौज ते सी.आर.पी.एफ नै पूरे इलाके दी घेराबंदी करी लेदी ऐ ते आतंकवादिणं दा पता लाने लेई बडु स्तर पर अभियान चलाया जा रदा ऐ। मन्नेया जा रदा ऐ जे एह् आतंकवादी पाकिस्तान थमां घुसपैठ करियै इत्थे तोड़ी पुजे दे ना। उआं इस बारै होर ब्यौरे गी अजें बलगेआ जा रदा ऐ।

<><><><><><>

## Rajnath China

रक्षा मंत्री राजनाथ सिंह होरें आखेआ ऐ जे भारत ते चीन बश्कार गल्लवात इक साजगार महौल च बड़े बवस्थित ढंगै सिर चलै करदी ऐ ते भारत कदें बी झुकोग नेई। लोकसभा चुनां लड़ा करदे बीजेपी दे मेदवारें लेई प्रचार गित्तै अहमदाबाद गेदे राजनाथ होरें आखेआ फौजी लेहाज़ कन्नै भारत इक ताकतवर मुख् बनी गेदा ऐ ते भारत अपने सब्बनें गवांडिणं कन्नै खरे सरबंध कायम करने दा हिमायती ऐ। सिंह होरें एह् विश्वास बी जताया जे भारत दे रक्षा निर्यात जेड़े माली बरे 2023-24 च 21 ज्हार करोड़ रुपें दा आंकड़ा बी बादा होना बरोबर जारी रौहगा। मंत्री होरें

आखेआ जे मोदी सरकार इस गल्लै गी यकीनी बना करदी ऐ जे रक्षा खेत्तर दिआं चीजां भामें मिसाइलां होन, बम्ब होन, टैंक होन जां होर दुए थेहार, इनें सब्बनें गी भारत दे लोकें आस्सेआ भारत अंदर गै बनाया जाना लोडचदा ऐ।



### Adm. Summer

जम्मू कश्मीर सरकारै सब्बनें प्रशासनिक सचिवें गी औंदी पैहली मई थमां सिविल सचिवालय श्रीनगर च अपनी हाजरी जकीनी बनाने दा निर्देश जारी कीता ऐ। प्रशासनिक सचिवें गी कम्में दी लोड मताबक सिविल सचिवालय जम्मू च मजूर रौहने लेई बी आखेआ गेआ ऐ। इस सरबंध्यै च जारी इक आदेश च आखेआ गेआ ऐ जे सैक्टरेट दौनें थाहें पर कम्म करोग ते प्रशासनिक सचिव दौनें थाहें पर दफ्तरें दे बवस्था आले कम्मकाज गी जकीनी बनागंन।



### New PM

प्रधानमंत्री नरेंद्र मोदी होरें अज्ज कर्नाटक दे बेलगावी च भारती जनता पार्टी दे मेदवार दे हक्कै च चुनां प्रचार कीता। इक सार्वजनिक जनसभा च बोलदे होई प्रधानमंत्री ते बीजेपी दे सीनियर लीडर नरेंद्र मोदी होरें दस्सेया जे पिछले 10एं बरें च उंदी सरकार नै लौहके करसानें दे हितै च कृषि उत्पादक संगठनें राहें राई-बाई दी लागत घटाने ते उंदी फसलै गी मुक्त मंडी हासल करोआने च मदाद कीती ऐ। उनें दस्सेआ जे 10 करोड़ महिला सेल्फ हेल्प ग्रुपें गी माली मदाद दिती गेई ते करसानें इथेनाँल गी ईंधन च रलाइयै 70 ज्हार करोड़ रपे कमाए। उनें आखेआ जे कांग्रेस पार्टी आस्सेआ बच्चें दे माता-पिता आस्सेआ उंदे लेई छोड़ी गेदी संपत्ति जायजदाद पर टैक्स लाने दी तज्वीज़ ऐ। उनें दोष लाया जे कांग्रेस पार्टी, हल ते मेड इन इंडिया कोरोना वैक्सीन पर सियासत करा रदी ऐ। उनें राहुल गांधी हुंदे इस बयान दी नुक्ताचीनी कीती जेदे च उनें आखे दा हा जे राजा महाराजा नागरिकें थमां गै पैसा किट्टा करदे हे ते फी उंदा गै शोषण करदे हे। नरेंद्र मोदी होरें आखेआ के शिवाजी महाराज, रानी चन्नम्मा बरोदा ते गायकवाड़, अहिल्या बाई होल्कर ते मैसूर दे वाडेयार बड़े दयावान राजा हे। उनें आरोप लाया जे राहुल गांधी हुंदे च साहडे मंदर तबाह करने आले औरंगजेब ते दुए नवाबें निजामें, सुल्तानें ते बादशाहें दी नुक्ताचीनी करने दी हिम्मत नेई ऐ।



### Gujrat Congress

सीनियर कांग्रेस लीडर अभिषेक मनु सिंधवी होरें भारती जनता पार्टी पर लोकवाद दी अनदिक्खी करने दा दोष लाया ऐ। अज्ज अहमदाबाद च इक प्रेस कांफ्रेंस गी संबोधित करदे होई सिंधवी होरें हाल च सूरत लोकसभा सीटै पर भारती जनता पार्टी दी जित्त गी लोकतांत्रिक सिद्धांतें दी उल्लंघना दस्सेआ। उनें दोष लाया जे बी.जे.पी नै रपे पैसे प्रशासनिक मशीनरी ते अमले दा गलत इस्तेमाल कीता ऐ। उनें दस्सेआ जे भारती जनता पार्टी दे कुल 417एं मेदवारें दा 1 बटा चौथा हिस्सा हाल च दुइयां पार्टियां छोड़ियै भारती जनता पार्टी च शामिल होए दे ना। साबका कांग्रेस अध्यक्ष राहुल गांधी कल्लै थमां गुजरात च चुनां प्रचार शुरू करडन।

## Shaurya Samarak

थेआरबंद बलें दे त्रै शहीद अफसरें मेजर अरविंद बजाला, मेजर रोहित कुमार ते फ्लाइट लैफ्टिनेंट अद्वितीय बल हुंदे चेतें च बनाए गेदे शौर्य स्मारक दा कल सैनिक स्कूल नगरोटा च अवारण कीता गेआ। ध्यानजोग ऐ जे देसै दी सेवा करदे होई अपनी जिंदु दा बलिदान देने आले एहू त्रवै इससै स्कूलै दे विद्यार्थी हे। चीफ ऑफ स्टाफ मुख्यालय 16 कोर ते सैनिक स्कूल नगरोटा दे मकामी प्रशासनिक बोर्ड अध्यक्ष मेजर जनरल पैलेन्द्र सिंह होरें वीर जवानें दिएं प्रतिमा थमां पर्दा गोआड़ेआ ते उनेंगी श्रद्धाजंलि भेंट कीती। इस मौके शहीदें दे माता पिता बतौर मान जोग परौहने उत्थें मजूद हे। शौर्य स्मारक उंदी दिलेरी-बहादरी दे सबूत दे तौरा पर मजूद हे, जेहड़ा ओने आलियें पीढियें ताई प्रेरणा दा जरिया बने दा रौहगा।



## Army Dramatic

करगिल विजय दिवस दे 25 बरे पूरे होने दे सिलसिले च फौज आस्सेआ राजौरी जिले दे टेंडर फीट स्कूल च नाटक खेडुने आले मुकाबले दा आयोजन कीता गेआ जेदा विशे-सार हा, करगिल युद्ध। एहदे राहें विद्यार्थियें गी इक ऐसा मंच उपलब्ध करोआया गेआ जेदे माध्यम कन्नै ओहू अदाकारी दे अपने हुनर ते भारती जवानें दे बलिदान दौनें दा खरी चाल्ली प्रदर्शन करी सकन।



## Avalanche-Warming

खराब मौसम गी ध्यानै च रखदे होई जम्मू-कश्मीर आपदा प्रबंधन प्राधिकरण जे.के.डी.एम.ए नै अगले 24एं घैंटें च कश्मीर घाटी दे चऊं जिलें दिएं उप्परलियें घाटें पर बर्फु दे ल्हास तोदे पौने दी चेतावनी जारी कीती ऐ। औंदे 24एं घैंटें दौरान उत्तरी कश्मीर दे बारामूला, बांडीपोरा, कुपवाड़ा ते मध्य कश्मीर दे गांदरबल जिले च समुंद्री सतह कशा 3 ज्हार मीटर उप्परै आलियें थाहरें मझाटली खतरनाक सतह दे ल्हास तोदे पौने दी शैंका ऐ। इनें इलाकें च रौहने आले लाकें गी सलाह दिती जंदी ऐ जे ओहू पूरी एहतियात बरतन ते अगले हुकमै तक्कर बर्फु दे ल्हास तोदे पौने आहलियें थाहरें पर जाने थमां गुरेज करन। पिछले किश दिनें थमां कश्मीर घाटी च बड़ी मती बरखा पवा रदी ऐ ते उप्परलियें प्हाड़ियें पर हौली बर्फबारी बी होआ करदी ऐ जिसे ध्यानै च रक्खियै गै प्रशासन नै बर्फु दे तूफान दी पेशनगोई करियै लोकें गी सौहगा रौहने लेई ताजा चेतावनी ते हुकम जा कीते न। प्रशासन नै इनें जिलें च रौहने आहले लोकें गी कुसै बी आपात स्थिति च मदाद लेई 112 नंबर पर डायल करने लेई आखेआ ऐ।

